

N 4.

1443; 1445 Februar 18

Nickel Hoburg verkauft einen Acker.

lose Einlage vor Bl. 168 ⁽¹⁾Nickel Hoburgk hat bekanth daz er Hanszen Cramer eyn agkir, an Mergintal gelegen, vorkauft hab, dor uff der pharrer czu Mergintal meynt teczschen und gerechtigkeit czu haben, des sich Hoburgk bisz her uff gehalden hat, und do bey gereth und globit, wy der dy richtikeit des teczschen czu Hanszen Cramers agkir den er oin vorkaufet hat mit rechte brecht, so wolle er oin do umbe eyn irstutung thun und schadeloz benemen.

Gotschalk aus Lauterbach verzichtet auf Ansprüche auf ein ererbtes Gut.

⁽²⁾Actum feria sta [?] quinta ante reminiscere hat Goldschalgk czu Lutirbach sich von seyn und synis weibes weyn vorczihen sulchir gerechtikeit und an irstorben gutis Jocoff Lindners seligen und dor czu er meynte gerechtikeit czu haben, gereth und globit daz sy Nickel und Hanszen Rodir, dy erbnemen Lindners, umbe sulche an irstorben gut nicht an redin noch vor keynen gerichte beteydigen wil nach nymanden von irin wegen an arge list.

1) Konzept zu Nr. 903 2) Konzept zu Nr. 904

N 5.

1456 April 12

Vergleich unter den Erben von Michel Seyfried.

lose Einlage vor Bl. 186 Wir rathmanne, voit und schephin der stad Czwigkaw bekennen und thun kunth mit dieszem unszerm offen brieffe und wollin, daz es wiszentlich sey allin den, dy on sehen, horen addir leszin, daz vor uns komen sint der erbar und veste Albricht von Ertmansdorff, dy ersamen und weiszin Nickel Reynbrecht, dy czeit voit czu Crymschaw, Nickel Heynrich und Nickel Wingkeler, Burger von Gluchaw, und Lucas Gortler, unserir stad mitburgir, und habin eyntrechtiklichin bekanth und uszgesagit, wy daz sy in der fruntlicheit mit wissen eyn gutliche schidung gemacht und beteydingit habin czwischin Hanszen Seyfride von Lindenaw, Michel Seyfridis gotseliger leiplichir brudir, von dem vatir Erhart, Michil und Mathis Seyffride mit Margarethan, ir swester, Andres Sneider von wegen synir tochter, Asman Dreysil von wegen synis weibis und Petir Roszener von wegen synir kindir, also rechte brudir kinder Michil Seyfridis an dem andern teil und czwischin frauwen Margarethan, Michil Seyfridis seligin gelaszine witwe, uff den drittinteil umbe alle gelaszine und verstorbene habe, in